

後集 一門

△諸經引證節略

大般若經

空中聲告常啼菩薩言，汝東行求般若，莫辭疲倦，莫念睡眠，莫思飲食，莫想晝夜，莫怖寒熱，於內外法，心莫散亂，行時不得左右顧視，勿觀前後上下四維等。

華嚴經

勤首菩薩偈云，如鑽燧取火，未出而數息，火勢隨至滅，解怠者亦然。釋曰，當以智慧鑽注一境，以方便繩善巧迴轉，心智無住，四儀無間，則聖道可生。瞥爾起心，暫時忘照，皆名息也。